



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA
JUDISIÁRIU

Komunikadu Imprensa

21 Janeiru 2014

JSMP preokupa ho deklarasaun Vice-Ministru Edukasaun Virgilio Smith

Iha 9 Janeiru 2014, Vice-Ministru Edukasaun Virgílio Smith hateten katak nia konsidera kazu fundador eskola Colégio São Miguel (CSM) ne'ebé espalla iha media sosial Facebook ne'e normál. Deklarasaun Virgilio Smith ne'ebé hateten "*o mane ka o feto? Mane ne'e mane. Ema buifeto maka la gosta buat ne'e...*". edisaun journal *Timor Post* (09/01/14)

“JSMP preokupa ho deklarasaun husi Vice-Ministru Edukasaun, ne'ebé fó autorizasaun ba profesór sira hanesan edukador ida atu halo asédiu no abuzu seksuál hasoru ninia aluna. Hanesan ema ne'ebé kaer kargu importante iha area edukasaun tenke fó xamada atensaun ne'ebé forte ba profesór ne'ebé viola ona ninia aluna, laos pelu kontrariu hodi hasa'e liafuan hodi dehan, kazu hanesan ne'e normál. Tuir lolos hanesan ema edukador ida profesór sira iha obrigasaun atu proteje ninia aluna sira kualker forma abuzu, laos atu viola fali sira nia direitu” dehan Diretor Ezekutivu JSMP, Luis de Oliveira Sampaio.

Tuir observasaun JSMP nia iha Tribunál mós hatudu katak kazu abuzu seksuál barak ne'ebé involve elementu profesór sira hasoru sira nia aluna. Por ezemplu, iha dia 3 Jullu 2013, Tribunál Distritál Dili kondena pena prizaun tinan 16 ba mestre ne'ebé komete violasaun seksuál hasoru ninia aluna(JSMP nia Komunikadu Imprensa dia 4 Jullu 2013,, www.jsmp.tl/komunikadu-imprensa-2013/). Aleinde ne'e, iha 25 Jullu 2013 Tribunál Distritál Dili mós kondena pena prizaun tinan 9 hasoru arguidu ne'ebé hanesan mestri ba kazu abuzu seksuál ba labarik ne'ebé ninia alunu rasik.

JSMP nota katak abuzu seksuál hasoru labarik nu'udar krime ne'ebé seriu teb-tebes tanba kontra direitu labarik sira nian no totalmente hamate sira nia futuru. Krime hanesan ne'e bele kauza trauma boot ba labarik tanba sira hetan abuzu husi ema ne'ebé sira fiar no lolos tenke proteje sira.

"Ita labele haluha katak labarik sira mak futuru nasaun nia. Tanba ne'e JSMP husu ba instituisaun relevantes sira hanesan Estadu nia liu-liu parte edukasaun ninia atu proteje labarik sira husi kualker forma violénsia ne`ebé afeta ba labarik sira nia futuru."

Deklarasaun husi Vise-Ministru ne'e kontra-produtivu teb-tebes ho komitmentu no esforsu komponente Estadu tomak atu investe ba edukasaun no investe ba futuru nasaun Timor-Leste.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefóne: 3323883|77295795

Website www.jsmp.tl

Facebook: www.facebook.com/timorleste.jsmp

Twitter: @JSMPtl